



**KUVENDI I SHQIPËRISË**  
***Komisioni për Veprimtaritë Prodhuese, Tregtinë dhe Mjedisin***

**Tiranë më, 5.03.2019**

**Dokument parlamentar**

**RAPORT**  
**PËR PROJEKTLIGJIN**  
**“PËR RATIFIKIMIN E MARRËVESHJES, NDËRMJET KËSHILLIT TË**  
**MINISTRAVE TË REPUBLIKËS SË SHQIPËRISË DHE QEVERISË SË REPUBLIKËS**  
**FEDERALE TË GJERMANISË, PËR BASHKËPUNIM FINANCIAR 2017, PËR**  
**PROJEKTIN “PROGRAMI PËR RINOVIMIN E KONVIKTEVE NË KAMPUSIN**  
**UNIVERSITAR TË TIRANËS, SIPAS PARIMIT TË EFIÇENCËS ENERGJITIKE,**  
**FAZA III”**

- ***Hyrje***

Komisioni për Veprimtarinë Prodhuese, Tregtinë dhe Mjedisin, në cilësinë e Komisionit për dhënie mendimi, në zbatim të neneve 32-38 të Rregullores së Kuvendit, shqyrtoi projektligjin “Për ratifikimin e marrëveshjes, ndërmjet Këshillit të Ministrave të Republikës së Shqipërisë dhe qeverisë së Republikës Federale të Gjermanisë, për bashkëpunim financiar 2017, për projektin “Programi për rinovimin e konvikteve në kampusin universitar të Tiranës, sipas parimit të eficientës energjetike, faza III”, në mbledhjen e datës 5 mars 2019.

Komisioni për Veprimtaritë Prodhuese, Tregtinë dhe Mjedisin caktoi deputeten Eglantina Gjermeni, relatore për shqyrtimin e këtij projektligji.

Të pranishëm në mbledhjen e Komisionit për të prezantuar projektligjin dhe për t’u dhënë shpjegime pyetjeve të deputetëve ishin përfaqësues të ministrisë së Infrastrukturës dhe Energjisë.

- ***Baza kushtetuese e projektligjit***

Projektligji i paraqitur për shqyrtim është propozuar nga Këshilli i Ministrave, sipas përcaktimeve të neneve 78, 83, pika 1, dhe 121 të Kushtetutës së Republikës së Shqipërisë dhe shoqërohet me relacionin përkatës sipas nenit 68 të Rregullores së Kuvendit.

- ***Qëllimi dhe përmbajtja e projektligjit***

Nëpërmjet këtij projektligji synohet ratifikimi i marrëveshjes, ndërmjet Këshillit të Ministrave të Republikës së Shqipërisë dhe qeverisë së Republikës Federale të Gjermanisë për bashkëpunim financiar 2017, për projektin “Programi për rinovimin e konvikteve në kampusin universitar të Tiranës, sipas parimit të eficientës energjetike, faza III.

Nëpërmjet marrëveshjes që propozohet për ratifikim, të dyja qeveritë bien dakord për akordimin e një granti nga qeveria gjermane, me vlerën deri në 2 927 765,96 euro, për zbatimin e fazës së tretë të projektit. Ky financim i cili do të vihet në dispozicion nëpërmjet Kreditanstalt für Wiederaufbau (KfW) dhe është planifikuar të fillojë disbursimin brenda vitit 2019. Detajet e disbursimit të fondeve grant do të përcaktohen më pas në marrëveshjen financiare që do të lidhet mes palëve.

Projekti, që do të financohet nëpërmjet këtij granti është parashikuar në programin buxhetor afatmesëm 2019-2021, ” të Ministrisë së Infrastrukturës dhe Energjisë, në programin “Mbështetje për energjinë”.

- ***Diskutimi në Komision***

Komisioni për Veprimtaritë Prodhuese Tregtinë dhe Mjedisin e shqyrtoi këtë projektligj, në cilësinë e komisionit për dhënie mendimi, në mbledhjen e datës 5 mars 2019.

Të pranishëm në mbledhjen e Komisionit për të prezantuar projektligjin dhe për t’u dhënë shpjegime pyetjeve të deputetëve ishin përfaqësues të ministrisë së Infrastrukturës dhe Energjisë.

Në përgjigje të pyetjeve të ngritura nga anëtarët e Komisionit, lidhur me ecurinë e deritanishme të projektit, përfaqësuesit e ministrisë së Infrastrukturës dhe Energjisë sqaruan se programi për rinovimin e konvikteve në kampusin universitar të Tiranës, sipas parimit të eficientës energjetike synon rehabilitimin e konvikteve të Universitetit të Tiranës, në funksion të rritjes së eficientës së energjisë dhe të kushteve të përshtatshme të studentëve, duke aplikuar masat e eficientës së energjisë në godinat e konvikteve, sipas objektivave:

- Auditim energjetik i ndërtesave për të identifikuar konsumin e energjisë dhe masat përkatëse që duhen për të reduktuar konsumin e energjisë.
- Identifikim i nevojave të rinovimit të ndërtesave në lidhje me gjendjen aktuale të tyre për të zgjatur ciklin e jetës së ndërtesave;
- Identifikim i masave të ndryshme të eficientës së energjisë që mund të aplikohet, si dhe llogaritja e kursimit të energjisë në secilën prej godinave, me qëllim përcaktimin e kritereve dhe të masave të eficientës së energjisë me një kosto të lartë përfitimi;
- Reduktim i konsumit të përgjithshëm të energjisë së ndërtesave, duke synuar që treguesi i performancës së energjisë të jetë të paktën 75 këh/m<sup>2</sup> në vit dhe të sigurojë përmirësimin e kushteve të jetesës së studentëve;
- Llogaritjen e reduktimit të karbonit si rezultat i masave dhe vendosjes në kushte të performancës së lartë (sipas synimit të mësipërm 75 këh/m<sup>2</sup>vit) dhe të standardeve të Bashkimit Evropian.

Projekti përfshin rehabilitimin e konvikteve nr.3, 14, 16, 17 dhe 18, në varësi të buxhetit në dispozicion, sipas përcaktimeve në marrëveshjet financiare tashmë të dakordësuara me KfW, në lidhje me financimet në vlerat prej 4 500 000 eurosh (faza I) dhe 2 032 179.23 eurosh (faza II), si dhe, mundësisht, rehabilitimin e dy – katër godinave të tjera konviktesh.

Nëpërmjet marrëveshjes që propozohet për miratim, synohet akordimi i një granti nga qeveria gjermane, me vlerën deri në 2 927 765,96 euro, i cili vihet në dispozicion nëpërmjet Kreditanstalt für Wiederaufbau (KfW) dhe do të përdoret për zbatimin e fazës së tretë të projektit.

**Në përfundim të diskutimeve**, Komisioni, me shumicë votash, e miratoi projektligjin në parim, nen për nen dhe në tërësi dhe u shpreh dakord për kalimin e tij për votim në seancë plenare.

**RELATORE**

**KRYETAR**

**Eglantina GJERMENI**

**Niko PELESHI**